



Memöie  
de un figgiu:  
regordi  
de un vegio zeneise...

# A FEA DE SANT'AGÂ

di Enrico Carbone  
"RICE"

**I**nti anni Trenta stavo de casa in via Imperiale e andavo a Scheua in via Paolo Giacometti. O sestè de San Fruttuoso, che finn-a a-o 1873 o lèa Comune prima de èse riunìo a Zena, o festezzava Sant'Agâ o çinque do meise de Frevâ con unna fea che foscia a se collegava co-e fee do Medio Evo quando i scangi èan ciù difficultosi pe tante raxoin. Ma foscia ghe saia unna relassion co-a procescion do Confeugo ch'a partiva da-o pontè de Sant'Agâ a-a vigilia de Natale. Chissà?

A fea a gh'è ancon a-a giornâ d'ancheu ma a l'è l'ombra de comme a l'èa settanta o novant'anni fa.

Intanto a durata.

Oa se risolve tutto int'un giorno. Ai mae tempi, lascemelo dî, a festa a comprendeèva a giornâ de Sant'Agâ e 'na domenega: armeno trei, ma ascì quattro giorni de baraonda.

Automobili ghe n'èa poche, ninte autobus, solo o tramway (o 37 pe De Ferrari e o 16 pe Pegi) ch'o doveiva avei e colisse sgombre.

O tempo da fea e o spassio.

In principio ho dito che stavo in via Imperiale e che andavo a scheua in via Giacometti: 'na raxon a gh'èa. E aule dove studiavo èan a-o primmo cian de via Michele Novaro inte l'*epicentro* da fea tra via Ajroli (dove se intrava inta giesa de Sant'Agâ), ciassa Giusti, corso Sardegna, ciassa Manzoni, scinna a ciassa Martinez co-e stradde *confluenti*: Filippo Casoni, Tomaso Pendola e Giovanni Torti.